

Aningaasaqarnikkut ingerlatsineq pillugu nalunaarut 2009

Saqqummiussissutissaq

(Aningaasaqarnermut Naalackersuisoq)

Siullermeerneqarnera

Matumuuna inatsisit naapertorlugit aningaasaqarnikkut ingerlatsineq pillugu nalunaarut 2009 saqqummiutissavara.

Namminersorlutik Oqartussat missingersuutaat pillugit Inatsisartut inatsisaat nr. 8, 29. oktober 1999-imeersoq naapertorlugu Naalackersuisut ukiumoortumik nalunaarummik, tassalu Aningaasaqarnikkut ingerlatsineq pillugu nalunaarummik, saqqummiussisussaapput tassani ilaatinneqassallutik Namminersorlutik Oqartussat aningaasaqarneranut tunngasut kiisalu aningaasartuutit isertitallu ineriartorsimanerat

Aningaasaqarnikkut ingerlatsineq pillugu nalunaarut 2009, 2009-p aallartinnerani suliarineqarpoq, Inatsisartut 2009-mi upernaakkut ataatsimiinneranni saqqummiunneqartussanngorlugu. Nalunaarut Inatsisartuni ilaasortanut agguanneqareerpoq.

Nalunaarutip suliarineqarnerata kingorna Inatsisartunut qinersisitsisigarpoq, tamaattumillu Aningaasaqarnikkut ingerlatsineq pillugu Naalackersuisuussimasut nalunaarutaat 2009-imi upernaakkut ataatsimiinnermi inatsisit naapertorlugit saqqummiunneqanngilaq.

Qinersisoqareernerata kingorna politikikkut pissutsit allanngorput, taamaattumillu aningaasaqarnikkut ingerlatsineq pillugu nalunaarutip 2009-p suliarineqarnerani tunngavigineqarsimasut aamma allanngorlutik.

Junimi Inatsisartunut qinersisoqareerneratigut Naalackersuisooqatigiit nutaat ivertinneqarput. Naalackersuisut nutaat siunissami aningaasaqarnikkut politikikkissartik aningaasanut inatsisissatut siunnersuut aqutigalugu saqqummiuppaat. Taamaattumik 2010-mut aningaasanut inatsisissatut Naalackersuisut siunnersuutaani nalinginnaasumik oqaasertaliussat aammalu 2010-mut aningaasanut inatsisissatut siunnersuutip Inatsisartunit 2009-mi ukiakkut ataatsimiinneranni oqallisigineqarnissaa innersuussutigissavakka.

Taamaattumik nalunaarutip imarisai tikinggikkukit tamanna pissusissamisoorpoq. Nalunaarut taamaasilluni inatsisartunut saqqummiunneqarpoq inatsisitigut piumasaqaataasut naammassineqarsinnaaqullugit.

Tamatuma saniatigut ilisimatitsissutigissavara Naalackersuisooqatigiinnissamik isumaqatigiissut Naalackersuisut ukiap ingerlanerani ersarissarniarmassuk aammalu Aningaasaqarnikkut ingerlatsineq pillugu 2010-mi nalunaarummi Naalackersuisut aningaasaqarnikkut periarfissat killiliisinnaasullu pillugit naliliinertik aammalu ukiuni aggersuni aningaasaqarnikkut politikikkissaminut pilersaarutitik saqqummiunniarmassuk.